

11

Page 11

3457

120-

LETTRE
IVSTIFICATIVE
D'VN DEPVTE' DE
Grenoble à Monsieur le
Prince.

J

M. DC. XV.

REV. J. R. L.

REV. J. R. L.

REV. J. R. L.

REV. J. R. L.

REV. J. R. L.

M. D. C. XV.

L E T T R E

J U S T I F I C A T I V E

*d'un Deputé de Grenoble à**M. le Prince.*

M O N S I E U R si nous n'auons presté main forte à vos desseins en vne occasion si pressante, où il y va & de la religion, & de l'Estat, la faute doit estre imputee à nostre interest particulier qui nous touche de plus pres que le repos du public, non au peu de connoissance que nous ayons des desordres de l'Estat. Ne faut pas estre trop cleruoiant, pour sçauoir que la France est aux abois abandonnee des medecins, jettant les derniers soupirs de sa liberté mourante, qu'au lieu de recevoir allegement parmy ses angoises, ses enfants mesmes la demembrent piece à piece, & implorent le secours des estrangers, pour partager au butin, l'on sçait que la minorité des Roys est vne cloche sonante à qui l'on veut, que la balance de Iustice establie saintement pour recompenser les bienfaicts, & punir les demerites ne sert maintenant qu'à iuger si les pistoles sont de poids, l'on voit le seau de France changer de nature, & toutes les lettres se cacheter de cire d'Espaigne, l'on voit les me-

decins n'appliquer les remedes au bassin, les Courts de Parlement prendre à toute main, & n'auoit qu'une bonne qualité requise, à scauoir de ne faire acception de personne, l'on voit la qualité de Mareschal vraye recompense des exploits valeureux, & faits à la veue de tout le monde, deuenir le loyer des actions honteuses de paroistre au iour & dont la nuit seule peut rendre quelque tesmoignage, l'on voit le payssant foullé de tailles pour assouuir des cupiditez desreiglees, & comme l'asne du monde labourer la terre, & manger les char-dons, la clef de saint Pierre, sous pretexte de pieté ouurir la porte aux seditions sa nasselle seruir à brigander les Royaumes, la houlette à dissiper les legitimes Roys, & assuiettir leur Couronne a des dominations estrangeres, l'on voit vne noblesse qui autrefois portoit sur le front cest escriteau de la vertu, ou de la mort. vendre leur honneur à beaux deniers contêts, se louer, & qui plus leur donne, porter vn espee au costé, non pour la patrie: mais pour tirer le sang du peuple, & rauer sa substâce avec impunité. Mais aussi n'ignorons nous pas que le mal n'ait pris ses racines trop auant, sans doute au temps ou nous sommes vn heureux succez est plus à desirer qu'à esperer, rien ne sert vne leuee de boucliers contre les Roys. Il ny a rien à gagner, faut endurer, & pour durer, & souffrir pour se maintenir la memoire tragique de Charles le ieune voltige encor deuant nos yeux, la playe en est toute saignante,

Nous fismes mettre l'espee à la main à ce ieune Prince qui ne la remit dans le fourreau si tost que nous eussions voulu ; Nous luy donnasmes vn peu d'affaires, & puis il nous enuoya en paradis par vn nouveau chemin: Encore estions nous en vn siecle bien plus propre à entreprendre & executer ; Il s'agissoit à decouuert de la religio puissant charme pour enfler les courages, ou maintenāt l'on ne nous menace que de loin, la nouueauté des opinions est tousiours plaisante au goust, & maintenant nos marchādises sōt si esuētee qu'elles ne peuvent apporter que de l'amertume, nous nous iettiōs courageusemēt parmy les espees, mespris de ceste vie sous esperance d'en posseder vne eternelle, maintenant nous sommes trefasseurez, de n'augmenter le nombre des esseus, nous marchions sous des Capitaines, ausquels l'attente estoit plus penible que le combat, dont les exploicts estoient plus tost sceus que les generalles, ils se declaroient à la teste d'vn armee, les surprises de Villes, estoient leurs manifestes, vous Monsieur, excusez moy si ie dis la verité, vous aymez mieux tirer vn trait de plume que donner vn coup d'espee, vous auez faict trop de bruit pour en venir au main, il n'est que prendre à la fourde, vn aduerty en vaut deux, vous passez vostre colere sur le papier, non que vous n'ayez du courage, car loin du peril vous verriez volontiers entre-choquer les armees; aussi n'est-ce vn plaisir extreme de considerer l'impetuositē de la

mer d'un lieu d'assurance, vne misere incroiable de l'esprouuer au milieu des vagues, ils auoient des chefs pleins de credit & d'autorité parmy les Soldats, les vostres sont inuisibles que nostre Eglise: car quant au Duc de Bouillon le malheur & la perfidie sont accidents inseparable de sa personne, quand au Conte de Palatin, il y a sur ses frontieres vn escumeur de mer qui a bouche & esperons, de Monsieur de Longueuille, quel exploit de guerre peut on esperer, il se laisse brauer par vn chien sur son fumier, qui est lasche en son endroit dit le Prouerbe est inutile enuers tous, Monsieur Dumaine outre que ce n'est qu'un o. en chiffre & qu'il est du nombre des saincts que l'on ne fesse plus, comment si fiera-on, o. que sa race nous a tousiours esté vn mauuais aiguillon. Pour Monsieur desdiguieres, son aage ne luy permet plus semblables equippez, il est sur le bord de sa bosse avec vn douleur de iambe estrange, tantost resolu de passer en Angleterre pour y trouuer remedes, par ce que les loups ny vont iamais, pour vous Monseigneur vos actions ne tesmoignent pas que la fortune vous ay reserué à la conqueste de la toison d'or, elles sont trop basses & pusillanimez, les actions d'un Prince doiuent tenir le milieu, au dessous elles sont dignes d'un mespris, au dessus elles sont insupportables. Outre cela leurs chefs estoient pleins de courtoisie & de liberalitez, dont l'une acquiert les courages, l'autre les conserue, en vous, autant de l'une

cōme de l'autre: vous estes plus propre à prendre ceux que nos predecesseurs auoient acquis, qu'a en reconquerir des nouueaux bien esloigné de l'humeur de Socrate qui tenoient ses iours mal employez où il n'auoit gaigné par faueurs vn nouueau seruiteur. Que si neantmoins parmy tous ses aduantages ils ont eu du tort quand ils voulu hoscher la bride à l'authorité du Roy, ie laisse iuger à vostre prudence quel issue on pourroit esperer de vostre procedé, & vous comme d'excuser nostre impuissance & n'accuser nostre compagnie d'ingratitude: car quiconque entreprendra de remuer iamais la volonté de luy seruir ne nous manquera, nostre mestier est de pecher en eau trouble, nostre religion prend son accroissement parmy les armes, elle se fortifie dans les ruines de l'estat, elle se dissipe dans la paix: aussi la pointe de l'espee est vn instrument bien plus puissant pour imprimer des opinions que non pas la parole, il faut auoir esgard au temps & lieu, quelques fois, il est bon de desguiser ses volôtez qui est a sō aise si doit tenir peur de trouuer pis, il vera tousiours tēps de remuer quād on nous attaquera, la defēsiue nous est plus aduantageuse que l'offensiue, à ce coup nous auons des villes d'ostage où nous monstrerons que le Roy n'en est Maistre que de bonne sorte, i'aduoue qu'elles ne sont pas en si grand nombre que celles de sainct Pierre, aussi Calvin n'est-il que le cadet, mais comme

quelquefois les cadets relient les maisons, aussi desirerions nous bien allonger nos coudees, apres auoir receu à Grenoble vostre lettre coenante rebellion, ce dessein auoit esté complotté; Nous eussions essayé de nous emparer de quelque piece, & puis faire vn honnesté accord; mais il suruint vne Marquise par salaire d'iniquité, dequoy nous luy sommes tres-fort redevables, qui ruina nos desseins, & nous arresta au milieu de la course, comme la desdaigneuse Atlante avec trois pommes d'or, on dit pour diminuer l'obligation que nous luy pourrions auoir que le conseil luy auoit ietté de la poussiere dans les yeux, mais n'importe: car nous en aurions à ceste heure tout le long de l'aulne, entre deux selles le cul à terre, le temps de la moisson n'estoit pas encor venu, lors qu'il sera venu. Nous tesmoignerons que les playes d'or ne peuuent amollir nos courages quand il s'agira de vous rendre seruices en faisant nostre profit.

Vostre tres-humble, &
obeyssant seruiteur, Jacques
Surueillant de Grenoble.

F I N.